



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

08 Marsu 2016

Timor-Leste komemora Loron fetu Internasionál

Loron 08 fulan-Marsu 2016, Timor-Leste komemora loron Internasioál ba Feto nu'udar loron importante hodi rekoñese kontribuisaun fetu Timor-Leste no fetu iha rai seluk, relasiona ho dezafiu ne'ebé sira enfrenta atu realiza direitu igualdade jéneru.

Tema selebrasaun ba loron mundiál fetu iha tinan ida ne'e mak "PLANETA 50:50: HALAIS IGUALIDADE JÉNERU" no tema nasional "HAMUTUK, HAMETIN, HO HABURAS IGUALIDADE JÉNERU IHA TIMOR – LESTE"

Tópiku sentral ba komemorasaun tinan ida ne'e ho objetivu atu atinji igualdade jéneru, hakotu diskriminasaun ba violénsia hasoru fetu no labarik nomós asegura oportunidade no partisipasaun hanesan iha aspeitu hotu-hotu iha moris lor-loron.

"Estadu Timor-Leste liuhosi instituisaun relevante sira governu nian halo ona esforsu oi-oin, atu dezenvolve fetu no enkoraza partisipasaun fetu iha aspeitu hotu-hotu. Mesmu nune'e, fetu no labarik fetu barak mak kontinua luta atu hakotu korente violénsia doméstika, violénsia seksuál no abuzu seksuál hasoru fetu no labarik sira, no diskriminasaun ho forma oin-oin ne'ebé sira hasoru," dehan Luis de Oliveira Sampaio, Diretór Ezekutivu JSMP.

Komemorasaun ba loron importante ne'e, nu'udar oportunidade atu haree no avalia dezenvolvimentu igualdade ne'ebé atinji ona iha nivel lokal no nasional, nomós enkoraja prótesaun ba fetu no labarik sira hosi kualker forma violénsia hasoru sira. Komemorasaun ne'e nu'udar kumprimentu ba obrigasaun konstitusionál ba norma internasionál sira ne'ebé Estadu ratifika ona.

JSMP mós rejista katak fetu no labarik barak mak trauma, lakon sira-nia futuru tanba sofre violénsia no violasaun oin-oin hosi sira-nia família. Situasaun no kondisaun hirak ne'e nu'udar rejultadu husi prátika kultural, ne'ebé nu'udar dezafiu iha konstrusaun ba kultura igualdade iha ita nia sosiadade.

JSMP deskobre realidade hirak ne'e husi atividade monitorizaun regular iha Tribunál Distritál haat iha juridisaun hotu iha Timor Leste, hatudu katak kazu violénsia doméstika, violénsia seksuál, abuzu seksuál hasoru menor no inestu barak mak julga ona iha tribunál sira.

JSMP apresia esforsu hotu-hotu ne'ebé Estadu halo liu-hosi polítika oin-oin atu asegura igualdade jéneru no polítika lejislativu atu proteze fetu no labarik fetu hosi violénsia. Maske nune'e JSMP nafatin enkoraza entidade hotu kontribui hodi dezemvolve kultura igualdade iha ita nia sosiadade. JSMP espera katak komemorasaun Loron Fetu Internasional ne'e la'os aktu nu'udar aktu serimonial deit maibe nu'udar komitmentu koletivu no institusional ida atu luta hodi hakotu violénsia hasoru fetu no labarik fetu sira iha Timor-Leste.

Relasiona ho komemorasaun loron importante ne'e, JSMP aproveita hodi kongratula fetu hotu iha mundu, liu-liu fetu Timor-Leste ne'ebé korazen kontinua luta hodi defende maluk fetu sira-nia direitu no luta ba lia-loos ho justisa.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org